



DEN NORSKE KYRKJA
Hyllestad sokn

ÅRSRAPPORT 2019

HYLLESTAD SOKN



Hyllestad kommune har eitt sokn med eitt sokneråd som har ansvar for både soknerådssaker og fellelrådssaker.

Kirkeloven 1996. § 9. *Menighetsrådets oppgaver*; Kyrkjeleg verksemd, gudstenester, vigsler og gravferder.

§ 14. *Kirkelig fellelråds oppgaver*; Økonomi, administrasjon, personale, tre kyrkjer og eitt kapell, tre kyrkjegardar.

Årsrapporten er eit samarbeidsprosjekt mellom sokneprest, kyrkjelydspedagog, kyrkjevevjerje og sekretær.

Jostein Ryland har skriva om sitt ansvarsområde ungdomsklubb og Base Camp.

Alle har gitt viktige bidrag om sine ansvarsområde til den gode kyrkjelege aktiviteten i Hyllestad sokn.

Hyllestad sokneråd har 6 faste medlemmer og 5 varamedlemmer.

Hyllestad sokneråd hadde fram til 31.10.2019 ansvar i soknerådssaker og til 30.11.2019 ansvar i fellesråds-saker:

Faste medlemmer

Brit Inger Skaar (leiar), Steinar Urnes (nestleiar), Marion Brendehaug, Jostein Ryland, Unni Systaddal og Odd Takle.

Medlem Liv Kristine Solheim søkte og fekk fritak frå våren 2019 og ut soknerådsperioden.

Varamedlemmer: Opprykk slik: 1. Reidun Skår, 2. Joakim Systaddal, 3. Rune Risnes (er og kommunal representant), 4. Olaug Brendsdal.

1. vara er alltid innkalla til møte og har møtt fast.

Geistleg representant: Audun Systad. Personleg vara: prost Reidar Knapstad.

Kommunal representant: Rune Risnes. Personleg vara: Eva Mette Olsen Høie (har ikkje vore innkalla).



Når soknerådet handsamer saker som i «kommuner med flere sokn, tilligger kirkelig fellesråd» skal det møte ein representant frå kommunen. Jfr. Kirkeloven § 6, 2. ledd.

Kyrkjevalet 2019: vart halde i den nye fleirbrukshallen på Hyllestad, der og kommune- og fylkestingsvalet vart halde. Valkomiteen si liste hadde 13 kandidatar frå heile kommunen, so likt fordelt etter kjønn som råd var, 7/6. 158 personar nytta røysteretten. Av desse var det 28 førehandsrøyster. Dette gjev ei valdeltakinga på 16 %, alle var over 18 år. Dette gav oss fylgjande sokneråd for perioden 2019-2023:



Hyllestad sokneråd frå 1.11.2019 soknerådssaker og frå 1.12.2019 fellesrådssaker:

Faste medlemmer: Linda Ølmheim, Reidun Skår, Steinar Urnes, Anny Dale Fureli, Liv Synnøve Andersen og Brit Inger Skaar.

Varamedlemmer: 1.vara: Atle Tonning, 2.vara: Odd Takle, 3.vara: Magnhild Hofland, 4.vara: Kurt Arve Kjos og 5.vara: Rune Risnes

Soknerådsleiar frå 1.11.2019 ved soknerådssaker og frå 1.12.2019 ved fellesrådssaker er Linda Ølmheim. Steinar Urnes, attvald, fortset som nestleiar.

I tillegg til val av nytt sokneråd var det samstundes val til nytt bispedømeråd. For første gang var det direkteval og første gang med tre ulike vallister. I tillegg til nominasjonskomiteen si liste, hadde både Open folkekyrkje og Bønelista egne vallister.

Tilsette hos Hyllestad sokn

Kyrkjeadministrasjon: 0.75 årsverk. Kyrkjevevjerje 25%, Irene Fløde –innleigd frå Fjaler sokn som dagleg leiar med hovudansvar. Kyrkjeseekretær 50%, Aslak Åm Sognnes, som etter eige ønske

reduserte til 40% frå 1.mars 2019. I tillegg til å vere sekretær har han ansvar for gravplassar inkl. festeavklaring. Han avlastar kyrkjevevjerje og har praktisk tilsyn med kyrkjer og kyrkjegardar, er altmogelegmann.

Kyrkjer: 0,75 årsverk: Kyrkjetenar 40%, Gunvor Instefjord og organist 35%, Erling Akse.

Trusopplæring, interkommunalt samarbeid: 1,0 årsverk fram til 30.6.2019.

Kyrkjelydspedagog 100% t.o.m. 30.6.2019, 75% frå 1.7.2019, Toril Lange.

Hyllestad sokneråd har arbeidsgjevaransvaret. Toril Lange arbeider 25% hos Hyllestad sokneråd, 50% hos Høyanger kyrkjelege fellelsråd og 25% hos Det Norske Misjonsselskap – NMS.

NMS sa opp sin avtale med Hyllestad sokn frå og med 1. juli 2019.

Hyllestad si finansiering av stillinga er statstilskot til trusopplæring og restfinansiering med innsamla midlar.

Tilsett hos Bjørgvin bispedømeråd: 0,6 årsverk.

Sokneprest 60%, Audun Systad. Soknepresten har avtale om inntil 40% stilling i sokna Askvoll og Fjaler, men arbeider i praksis meir enn 60% i Hyllestad sokn.

Soknepresten er, i tillegg til å være fast medlem i soknerådet, også representert i kommunen sitt kriseteam.

Kyrkjekontoret

Kyrkjeadministrasjonen og soknepresten har gode kontor i tredje etasje på kommunehuset, med utsikt til Hyllestad kyrkje. Ulempa er at her, til liks med alle kontora i kommunehuset, er veldig lytt. Til fortrulege samtaler må soknepresten nytte kyrkja.

Datamaskinene, som vart kjøpt brukt i 2014, takka for seg, og denne gongen vart dei erstatta med nye.

Soknerådsmøte

Soknerådet hadde 6 møter og handsama 46 saker. Soknerådet hadde fast møtedag på tysdagar frå kl. 15.30.

Årlege saker er budsjett, økonomiplan og rekneskapssaker, samt årsrapport. Det er òg gudstenesteplan og offertildeling. Soknerådet hadde eit normalt driftsår utan dei store sakene.

Dette året var det kyrkjeval, som er kvart fjerde år. Avvikling av valet er arbeidskrevjande for ein liten administrasjon sjølv om soknet har berre ein røystestad.

Kyrkjelydsmøte med framlegging av Hyllestad sokn sin årsrapport var i forlenging av gudstenesta i Hyllestad kyrkje søndag 17. mars kl. 16:00. 22 stk. var samla og tok del i orientering og kyrkjekaffi. Soknerådsleiar Brit Inger Skaar, sokneprest Audun Systad og kyrkjelydspedagog Toril Lange orienterte om årsrapporten og arbeidet sitt.

Prostevitjing. 16. november 2019 hadde prost Reidar Knapstad si årlege prostevitjing i Hyllestad sokn. I år ønskte prosten å samtale om ettervisitasrapporten. Eitt år etter bispevisitasen skal soknet svare på utfordringane biskopen kom med i visitasforedraget sitt. Møtet var i kyrkja og ein diskuterte m.a. korleis skjermtavla kan gjerast mindre dominerande.

LIVSRITER

	2016	2017	2018	2019
Dåp - totalt	9	12	10	8
Dåp - busette i Hyllestad	7	7	7	4
Konfirmant	18	17	18	10
Vigsel	3	1	0	0
Gravferd	10	17	15	20

Det er no slutt på at kyrka får melding om fødsjar. Vi får heller ikkje henta ut frå medlemsregisteret, barn av medlemmer. Vi får difor ikkje lenger sendt ut orientering om dåp. Dei fleste vel likevel å ta kontakt med kyrkja og ønskjer å døype borna sine. Vi prøver å orientere om dåp i kyrkjebladet.

Ved dåpssamtalen får foreldra eit innramma dåpsbilde (med eit bilde og eit vers) og ein CD med kristne songar. Ved dåpen i kyrkja får dei eit dåpslys.

Konfirmanttalet var det lågaste på mange år, berre 10, før det får eit oppsving igjen året etter. Ingen ønskte kyrkjeleg vigsel, men eitt par ønskte kyrkjeleg velsigning.

Gravferder var det høgste talet på mange år, 20 stk. Fordelinga var 9 i Hyllestad kyrkje, 4 i Bo kyrkje, 4 i Øn kyrkje og 3 i Øn kapell.

BARNE – OG UNGDOMSARBEID – HYLLESTAD SOKN 2019

v/kyrkjelydspedagog Toril Lange

Mange av tiltaka i trusopplæringsplanen er no godt innarbeidd, og oppslutnaden er stort sett god. Men framleis er det alderstrinn som ikkje får noko tilbod kvart år frå kyrkja. Dette må drøftast både i sokneråd og i trusopplæringsutval og sjå om det er høve til å starte opp det tiltaket som var tenkt for målgruppa eller tenke alternativt tiltak. Ungdomane derimot har eit tilbod i Ungdomsklubben Solution og BaceCamp.

Soknet har godkjent trusopplæringsplan frå 16.01. 2013, som ein delvis gjennomfører. Planen må reviderast, slik at den samsvarer meir med kva det som verkeleg skjer. Sidan 2013 har ein del føresetnader endra seg og ein har gjort ein del erfaringar. Tiltak som ikkje er med i den opphavslege planen er og kome til.



Følgjande trusopplæringstiltak vart gjennomført i 2019.

Myldresamling er eit tiltak som er ganske nytt og som ein har fått mange gode tilbakemeldingar på. Det starta opp vinteren 2018. Ein ville ha eit tiltak for born under skulealder (frå 3 til 6 år) som hadde vore med på noko i kyrkja hausten før. Vinteren/våren 2019 var det 4 myldresamlingar. 22 av 35 born i målgruppa var med på ei eller fleire samlingar. Myldresamlingane er onsdagar kl. 17.15. Det startar med ei samlingsstund på ca. 30 min med song (songkort), bibelforteljing med flanellograf og lystenning. Deretter kan dei som vil, stoppe igjen og ete kvelds.

Kvar haust har det i fleire år vore eigne samlingar for dei ulike aldersgruppene. Fleire gonger har ein vurdert om ein skal endre samlingane om hausten, og inviterer fleire

alderstrinn samstundes. Førebels held ein fast på slik det alltid har vore.

Hausten 2019 var det

Myldresamling for 2- og 3 åringar med tema Noahs ark og bordbøn. Det vart servert graut og alle fekk med seg etebrikka med teksten «O, du som mettar liten fugl» heim. 8 born kom.

4 årssamling og hausttakkefest

med utdeling av «*Mi kyrkjebok 4*»
med aktivitetshäfte – «Gjere
saman.» Alle var med på ei eller
begge samlingane.



5-årssamling. Hausten 2019 var det 2 «kyrkjerottesamlingar». På familiegudstenesta i november delt ut *DVD: Kirkerottene* eller *Kirkerottene på sirkus* til 5-åringar. 9 av 12 var med på ei eller alle samlingane.

Førsteklasses og Mi kyrkjebok 6

Det var ein 6-åring som var med på 6-årssamlinga medan 4 born fekk *Mi kyrkjebok 6* på familiegudstenesta.

Myldresamling – tema jul var for alle som vart 2, 3, 4 eller 5 år i 2019. I tillegg til song, julefortelling, lystenning og kvelds, var det ei formingsøkt der dei lagde englar.

På **tårnagenthelga** er det samling i Øn kyrkje på laurdag og Hyllestad kyrkje søndag. Det er no blitt ein tradisjon at tårnagenthelga er for 3. og 4. klasse, og at alle har høve til å vere med 2 år på rad. Dette fungerer svært bra. I 2019 var det 13 tårnagentar.

Besøk i kyrkjetårnet er ein viktig del av tårnagenthelga. Difor var ein i Øn kyrkje laurdag. Tårnagentgudstenesta søndag var i Hyllestad kyrkja sidan det der er enklare med kyrkjekaffi og det tekniske. Tårnagentane var med å gjere det til ei flott gudsteneste. Mange foreldre bidrog på ulike måtar og var med å gjere helga til ei god oppleving.

Bibelutdeling var på såmannssøndag og tårnagentgudsteneste. 6 biblar var delt ut denne søndagen. Seinare vart delt ut 5 biblar på minikonfirmantsamlingar. Tårnagentgudstenesta markerte også starten på minikonfirmantopplegget.

Minikonfirmant for 10/11-åringar(5. klasse) består av 4 samlingar i Hyllestad kyrkje rett etter skuletid, weekend og diplomutdeling. Utdelinga var på siste gudstenesta før påske. Weekenden på Alvøra i april var saman med minikonfirmantar frå Høyanger, Gulen og Balestrand. Alle som hadde fått invitasjon, var med på minikonfirmantopplegget.

Det var ikkje **LysVaken** i 2019. Tiltaket vert no gjennomført annakvart år og er då for både 6. og 7. klasse. Neste gong er i november 2020.

Trusopplæringsutval

Trusopplæringsutval (TRU - utval) har følgjande medlemar: Unni Systaddal (frå Soknerådet), Liv Kirsten Mjell Hofsvik, Anfrid Misje Åsmul, Kari Systad og kyrkjelydspedagog.

Utvalet har hatt 1 møte der ein evaluerte tiltaka som er gjennomførte og vurderte nytt tiltak. Ein drøfta m.a. familiesøndag. Det er, så langt, satt på vent.

Hyllestad kyrkje er ein god stad å ha samlingar. Born, unge og foreldre trivst godt der og dei føler seg heime i kyrkja. Multimedia-anlegget lettar ofte arbeidet mykje. Kyrkja er eit godt lokale til mange ulike aktivitetar. Det er lett å ha måltid her, anten det kyrkjekaffi eller kvelds. Bordfellesskap er med å skape kontakt, tilhøyrrighet og trivsel. Her kan vi både ete, sove, leike, sjå film, myldre, be og ha gudsteneste.

I kyrkjelyden er det gode medarbeidarar med omsyn til trusopplæring, men ein treng likevel fleire. I tillegg er det positive og viljuge foreldre som stiller opp på einskildtiltak når borna deira er med. Nokre konfirmantar har og vore med som ungdomsleiarar på samlingar for born. Alle gjer ein flott og viktig jobb!

Vegen vidare:

Myldresamlingane har vore svært positive. Det må ein bygge vidare på.

Kanskje kan desse sjåast i samanheng med familiesøndag.

Det er få (berre Lys Vaken) og ikkje tilbod til 6.-7. og 8. klasse. Kva kan gjerast her? . Likeins manglar ein tiltak for 7-åringar (2. klasse). Skal ein starte opp med noko? Ein må vurdere om ein har kapasitet til å starte nye tiltak, for det er også viktig å ta vare på det som fungerer godt. Skal ein lukkast og skal ein kome vidare med det viktige og spennande arbeidet, så er det ein føresetnad med fleire medarbeidarar som tar ansvar.

Samarbeid kyrkje – skule, barnehage og konfirmasjonsundervisning v/Sokneprest Audun Systad (AS)

Samarbeid kyrkje – skule og barnehage

Hyllestad kyrkje har ei sær god plassering mellom skulen og barnehagen på Hyllestad.

Skulegudstenesta til jul er godt innarbeidd og det var fin deltaking ved born, både med lesing og musikk. 19.des.2019 var det ekstra mange innslag, då det og var ei gruppe frå Hyllestad musikk-korps som deltok. Ein har inntrykk av at familiar med born frå andre kulturar og religionar også prioriterer desse samlingane. Elles er det vanleg fritaksrett, men mest alle er med. Same dagen var det og gudsteneste for barnehagen, der det denne gongen la seg til rette for ekstra mange.

I 2019 vart det på ny påskevandring, ei fin gruppe Ved møte med lærarane under visitasen kom det ønskje om ein ny, fast samarbeidsplan med kyrkja. Svært gledeleg, og planen kom til på nyåret 2020

Konfirmasjonsundervisning

I 2019 var det konfirmasjonsgudstenester i Hyllestad og Bø kyrkje. I Øn kyrkje var det etter planen berre ein konfirmant, og han vart konfirmert saman med dei i Hyllestad, slik at gudstensta i Øn gjekk ut. Det var eit lite konfirmantkull dette året, berre 10. Under visitasen fekk dette kullet ekstra mange oppgåver. Det er god oppslutning om kyrkjeleg konfirmasjon i Hyllestad.

Ein har ført vidare samarbeidet med Lavik. Det er om lag annankvar torsdag, no rett etter skuletid. Kyrkjerommet i Hyllestad høver godt til konfirmasjonsførebuing. Ein brukar opplegget «Delta» som IKO gjev ut, samstundes som det er vekt på song og drama i løpet av året. Ein har freista teke med styrken frå det tidlegare opplegget «Følg meg», med mykje gruppearbeid.. Kvar samling tek til med opning og avslutning kring lysgloben.

I 2019 var det på ny ein vellukka leir på Alværa saman med Balestrand og Bjordal. I tillegg til sokneprest i Hyllestad, er sokneprest i Lavik, Andreas Ester, trusopplærar Toril Lange (av og til) og dei to frivillige medarbeidarane frå Hyllestad, Kirsten Gravdal Ryland og Linda Ølmheim med. Ved temagudstenesta våren 2019 deltok og Jostein Ryland saman med Kirsten på song. Ein tek til med brød og pålegg på samlingane.



Konfirmantane hadde, som nemnt, besøksdag på Eiklund, med song og fin samtale med bebuarane. Konfirmantane er kyrkjevertar på gudstenester, noko som vert sett pris på av kyrkjelyden. Etter konfirmasjonen var konfirmantane samla i Hamneparken i Sørbøvåg og ved naustet til Kari og Audun. Det vart også tid til leik og volleyball-spel.

Ungdomsklubben i Hyllestad og Base Camp v/ Jostein Ryland

Ungdomsklubben i Hyllestad kyrkje

Ungdomsklubben hadde nokre få forsøk på samlingar tidleg i 2019, med liten oppslutnad, og i haust har vi ikkje klart å halde oppe eit tilbod. Litt av di dei jentene som har vore drivkrafta her, no er vekke på skule og anna, eller travle i jobb. Men vi har nokre tankar i lag med Mari / Veslemøy, so kanskje vi kan få til noko igjen, vi får sjå til våren / hausten kva vi kan gjere, kjem til å ta kontakt med Audun på dette 😊

Base Camp i Hyllestad

Base Camp i Hyllestad er eit «begrep» og eit årleg arrangement, eit arr. som no når både ungdommar i Hyllestad og ungdommar godt utover våre kommunegrenser, frå Sunnfjord til sør om Bergen. Den 4-6 oktober 2019 var igjen ca. 50 ungdommar samla i Hyllestad, der ca. 40 av desse var påmelde som deltakarar og der ca. 10 var deltakarar med arrangør og gjennomføringsansvar. Utover desse kom der ca. 10-20 ekstra personar på dei to opne arrangementa, kveldsmøte fredag og gudsteneste sundag.

Arrangementet sitt program var i 2019:

- Samling i Hyllestad kyrkje fredag kveld m. ulike aktivitetar, lovsong og andakt (ope for alle)
- Overnatting og frukost på skulen laurdag morgon
- Føremiddagsmøte i kyrkja
- Temasamling om organisasjonen «Opne Døren» i kyrkja
- Aktivitetsdag i kvensteinsparken og i nye Hyllestadhallen, laurdag middag/ettermiddag
- Kveldssamling i Hyllestad kyrkje m. lovsong, vitnemål og underhaldning
- Overnatting og frukost i Hyllestad kyrkje sundag morgon
- Gudsteneste i Hyllestad kyrkja (ope for alle)
- Avsluttande samling for deltakarar m. fl.

Base Camp i Hyllestad opplever vi som eit viktig arr. og også i år var vi svært glade for å notere ein god lokal gjeng med Hyllestad ungdommar som deltok denne helga. Dette gjev oss lokalt energi og vilje til å planlegge for nytt arr. til hausten 2020, så det er berre å sette av fyrste helga i haustferien alt no 😊

Base Camp 2019 er det femte Base Camp arrangementet i Hyllestad. Noko av det som gler oss mest å sjå er dei lokale ungdommar som for fem år sidan var med som konfirmantar, no er med å tek større og større aktiv del i leiargruppa for gjennomføringa av arrangementet.

Talarar i år var:



Ole P. Linder - Benjamin Vindenes - Natalie Schubert

Base Camp leiarar for gjennomføringa var i år Askøy sin Marcus Vindenes og Joakim Birkeland i lag med styret i Hyllestad Solution, Karine, Veslemøy, Gina, Adrianne og Mari ☺



Desse ungdommane er dei som står for planlegginga og gjennomføringa av leiren, vi vaksne er med og legg til rette for det praktiske og trygge rundt mat, overnatting m.m.

Ynskjer her å rette stor takk til skulen v. rektor, Hyllestad kommune v. Gjermund Flage og til Kvernsteinsenteret v. Franziska Rüttimann Storemyr i Hyllestad, for at vi får låne, og bruke, lokalar og område, til gjennomføring av ulike aktivitetar og til overnatting og servering av mat m.m. I år var det særskjelt å kunne ta i bruk den nye Hyllestadhallen på laurdag ettermiddag, og særleg vart biljardsalen ein populær samlingsplass for aktivitet, stor takk til biljardgruppa som sporty stilte opp ☺. Og ikkje minst må vi takke alle som stiller opp med mat, hjelper til under arrangement, og stiller opp som nattevakter og med tilrigging og nedrigging av utstyr, anten dei er tilreisande eller frå Hyllestad, utan dykk hadde dette ikkje gått an å arrangere på ein slik god måte som Base Camp i Hyllestad er blitt.

Vi opplever at Base Camp i Hyllestad er noko mange ungdommar gler seg til kvart år, og mange reiser også lang veg for å kunne delta her år etter år. For våre lokale ungdommar trur vi det er svært viktig å få oppleve at andre ungdommar frå våre nabo-kommunar, og frå Bergen, Askøy, Arna, Lindås og Haugesund, kjem til Hyllestad og synest dette er ein flott plass, der dei deler gode opplevingar i lag, og slik knytter nye framtidige vennskapsband.

Takk for Base Camp 2019 og vel møtt til Base Camp nr. 6 i rekka 2.-4. oktober 2020 ☺

Jostein og Kirsten Ryland

Gudstenester

	<u>2015</u>	2016	2017	2018	2019
Gudstenester – totalt i Hyllestad sokn					
inkl. kvardagsgudst, barne og skulegudst.	50	56	50	53	47
Frammøte totalt	3086	2979	3207	3318	2597

Frammøte inkluderer kyrkjelege tilsette.

I Bø kyrkje var det 6 gudstenester der oppmøte på konfirmasjonsgudstenesta og julaften var på om lag 100. Dei 4 andre gudstenestene varierte frammøtet mellom 8 (Skjærtorsdag) og 14.

I Øn kyrkje var det 7 gudstenester. Her var det ikkje konfirmasjonsgudsteneste. Julaften var oppmøtet 130. Dei andre gudstenestene varierte mellom 12 og 58 (2 dåp).

Øn kapell hadde gudsteneste 3 mars med 15 frammøte.

Det var 3 friluftsgudstenester. 2. pinsedag ved Sørefjordvatnet med 19 frammøte. 29. juni ved Espedalsvatnet med 23 og 4. august i Lifjorden med 43.

25. august var det gudsteneste i Ramsgrø bedehus med 50.

Dei fleste gudstenestene var i Hyllestad kyrkje. Her varierte tal frammøte mellom 10 (30. mai) og 223 på konfirmasjonsgudstenesta.

GUDESTENESTELIV, EIKLUND HYLLESTAD OMSORGSSENTER og DIAKONI

Sokneprest Audun Systad

Gudstenesteliv i Hyllestad

Medan ein i 2018 hadde kyrkjejubileum og bispevisitas, var det i 2019 eit «normalår» igjen i Hyllestad kyrkjelyd. Det var nokre færre gudstenester dette året, og ein registrerer noko nedgang i frammøtet. Noko av forklaringa kan ligge i eit lite konfirmantkull (ei av dei tillyste konfirmasjonsgudstenestene gjekk ut, fordi den eine konfirmanten ynskte å bli konfirmert saman med andre.) Det var relativt få gudstenester med dåp, og nokre av friluftsgudstenestene kom på dagar med usikkert ver.

Biskopen, som i 2018 rosa kyrkjelyden for eit jamt og bra frammøte, sa også ord me gjerne kan ta til oss på ny: « *Gudstenesta opnar opp for møtet med Gud, der trua kan leva og få næring, der vi kan høyra evangeliet om frelsa i Jesus Kristus. Det er ikkje nok å vita det, vi treng at evangeliet vert sagt til oss, vi treng å høyra det på nytt, å oppleva det på nytt. Det er grunn god nok til å gå på dei vanlege gudstenestene, når det ikkje er ein spesiell dag. Det er difor kristne til alle tider har samlast på søndagen. For å gje Gud ære og fordi trua treng det*»

Det er igjen viktig å minne om at me ser verdien av å samlast på tvers av geografiske avstandar, fordi me er ein kyrkjelyd. Det må og takast med at nokre gudstenester vert haldne på Alværa, og der kan vere fleire frå Hyllestad, slik som konfirmant – og minikonfirmant-gudstenester. Til Alværastemnet 2.juni kom kyrkjelyden i Balestrand på besøk, og Hyllestad vart oppmoda om det same. Me var ein fin flokk der (65). Kjetil Netland heldt talen, Audun Systad var liturg og den tidlegare presten i Hyllestad, Ole Agnar Helland, var organist.

Gledeleg er det på ny å kunne skrive at trusopplærings-gudstenestene samlar mange born og familiar. Her får ein unik kontakt med ei breidde av denne gruppa i kyrkjelyden. I dei aller fleste av desse gudstenestene står kyrkjelydspedagog, organist og sokneprest saman om planlegging og gjennomføring. Gode hjelparar i trusopplæringsutval og andre stiller også opp; av dei og fleire foreldre, som syner interesse og støtte.

Ei friluftsgudsteneste ved tomta til dagsturhytta, fall på ein litt dårleg dag vermessig. Tilbakemeldingane var at dette vil ein gjerne prøve på ny, no når hytta er kommen opp! Fjøs/naustmessa ved Espelandsvatnet har nærast blitt ein tradisjon. Takk til lokale krefter som syter for servering. Aller best frammøte var det ved Havørnbautaen i august, der det var 43 frammøte. God mat ved grendalaget! Den planlagde gudstenesta i Porten måtte dessverre gå ut, grunna dårleg ver og høge bølger, men det må prøvast igjen! Det er gledeleg at ein har fått godt i gang kyrkjevertordninga med kyrkjekaffiar etter dei aller fleste gudstenestene. Det involverer fleire.

Tid for tru-

samlingane som ein tok til med i 2016, fekk ein på ny gå vidare med våren 2019. Då var temaet: «Til glede». Det er utarbeidd av sokneprest Bjørn Nygaard for Bjørgvin bispedøme. Ein hadde 5 samlingar utover våren, og ei «meditasjonsgudsteneste» ein kveld i mai. Desse samlingane som var eit studium i Flipparbrevet, samla 10-15 og vart leia av Audun Systad. Ein trur at desse møter eit behov for undervisning av vaksne.

Bønesamlingar

Desse samlingane har no gått jamt og trutt frå mai 2016, og heilt til dags dato. Det er onsdagskveldar kl.19.30-21.30, og starta som : *Song, bøn og samtale*. Det er ikkje alltid dei har blitt kunngjorde, men det vil ein forsøke å gjere, slik at alle kan sjå at det er opne samlingar. Samlingane vart omtalt med intervju i kyrkjelydsbladet nr.2/2017. Det er på det jamne 5-7 personar som samlast. Det er verdifullt for ein kyrkjelyd at nokon ber, det gjev styrke til arbeidet elles. Bønegruppa fortel at det blir meldt inn emne som menneske i kyrkjelyden ønskjer det skal bli bedd for. Av og til er det aktuelt med temakveldar/gudstenester same onsdag.

Involvering

Arbeidet med involvering heldt fram og i 2019, jamfør kyrkjevertordninga. Konfirmentar vert spurde om oppgåver, og som nemnt er involveringa stor i gudstenester tilknytt trus-opplæringa. Ikkje sjeldan er det bønnevandring ved slike gudstenester, det er med å aktivisere kyrkjelyden på ein fin måte. Samstundes har ein ikkje fått hatt så mange møte i gudsteneste – og diakoniutval. Det skuldast at det kan vere tidkrevjande, og at ein er få tilsette med lågare stillingsprosent enn før. Dette vert eit satsingsområde for nytt sokneråd

Organist og prest har fleire gonger formidla spørsmål om song- og musikk-innslag, noko som har vorte sett pris på. Kirsten og Jostein Ryland syng ved fleire høve, og formidlar spørsmål til andre. Det er verdfullt. Gruppa «Moreld», har me gledeleg nok fått høyre meir til det siste året.

Innslag om misjon og kontakt over landegrensar

Hyllestad kyrkjelyd har i ei årrekkje støtta misjonsprosjektet i Mali, gjennom Det Norske Misjonsselskap (NMS). Trus-opplærar Toril Lange som sjølv har vore misjonær i Mali, tek dette aspektet med inn i undervisninga i kyrkjelyden og ved leirar på Alværa misjonssenter. NMS inviterer årleg til samlingar for heile Sogn og Fjordane. Soknepresten var tilstades på ei slik samling på Vassenden kyrkjesenter i september. Då var misjonær Frode Brugger Sætre der og fortalde om eit spennande arbeid i Mali. Det er store utfordringar når det gjeld islamisme, men midt i dette kjem fleire til tru,

Når det gjeld naudhjelp, formidlar Kirkens Nødhjelp sin fasteaksjon viktige impulsar både til konfirmentar og andre.

I mars hadde ein besøk frå Israelsmisjonen, ved ei søndagsgudsteneste. Der fekk ein formidla det viktige oppdraget kyrkja har overfor det jødiske folk, og ei gruppe frå Luster deltok med fin song.

Keltisk kveld - samarbeid med Folkeakademiet

Folkeakademiet har ei lang og god fartstid i Hyllestad, og også fleire samarbeidstiltak med kyrkja. «Keltisk kveld» var eit slik tiltak. Søndag 24.november var ein samla i Hyllestad kyrkje, der Bjørg og Kjell Sæter, pensjonert prestepar frå Leikanger, fortalde og viste bilete frå Noreg og Irland. Ikkje minst steinkrossane var framme som tema, og Hyllestad spela ei viktig rolle. Det var song med kjente og ukjente salmar og songar med irsk og skotsk og engelsk bakgrunn. I tillegg til fleire allsongar, song Jostein Ryland og Ragnhild Stav spela flygel.

I 2020 tek Audun Systad til på ei etterutdanning, for å få meir kjennskap og kunnskap om bakgrunnen for steinkrossane, som saman med kvernsteinane er ein viktig identitetsbyggjar for Hyllestad.

Kystpilgrimsleia

Dei siste åra no har det nasjonalt vorte arbeidd med Kystpilgrimsleia. Det er «ei vakker og spektakulær reise langs Noregs viktigaste ferdselsveg. Reisa startar i Egersund og endar ved nasjonalheilagdomen Nidaros domkyrkje i Trondheim. Både norske og utanlandske pilegrimar valfarta langs kystleia til Nidaros, som var det viktigaste pilegrimsmålet i Nord- Europa fram til reformasjonen i 1537.» Dette og mykje meir kan ein lese på nettsida: pilgrimsleden.no Kvernsteinsparken i Hyllestad er eit såkalla «nøkkelområde» på denne vegen. Der kan ein få stempel i «pilgrimspasset». Dette kom på plass sommaren 2019.

Audun Systad vart spurt av Bjørgvin bispedøme om å møte representantar for Kystpilgrimsleia, som var på segltur nordover, og hadde møte i Eivindvik 21.august. Dette vart eit møte til inspirasjon for vegen vidare lokalt omkring dette.

Eiklund – Hyllestad omsorgssenter

Torsdag 11.30 var det og i 2019 mange andakter på Eiklund ved prest og organist, ein til to gonger i månaden. Frammøte må ein seie har vore stabilt, og også aukande dei siste par åra. Nokre av dei eldre frå Eiklund møter og trufast opp til gudsteneste i Øn kyrkje.

På institusjonen som heilskap, er det mange som ikkje er i stand til å komme på andakten. Då er det viktig at dei som ønskjer det kan få besøk av prest i etterkant. Personalet er flinke til å formidle det, og det har vore ganske mange slike besøk. Det er no faste besøksdagar ved prest.

I januar var , tradisjonen tru, konfirmantane på besøk, og Kirsten Gravdal Ryland og Audun Systad hadde ansvar, for det som vart ein fin ettermiddag, med god kontakt med bebuarane. Tilsaman var me 37 i daglegstova!

Diakoni – Kyrkja si medmenneskelege omsorg og fellesskapsbyggjande arbeid.

Hyllestad sokn har som kjent ingen diakoniarbeidar no , men mykje av arbeidet vårt har eit diakonalt tilsnitt, og det er omtala under dei ulike emna i årsrapporten.

Frå 2016 vart det oppretta eit felles gudsteneste- og diakoniutval. Det har mellom anna ført til fast kyrkjekaffiar. Elles kan ein vise til tiltaka på Eiklund omsorgssenter, der sokneprest og organist har andakter eller besøksdagar (soknepresten), litt mindre enn annankvar torsdag. Godt er det at frivillige til tider trer inn både med andakt og musikk.

På Eiklund vert presten ofte spurd om kontakt og samtale med bebuarar.

Mellom kyrkja og flyktingetenesta er det kontakt, men dette kunne gjerne blitt prioritert meir frå kyrkja si side, om ein hadde hatt ressursar til det. Nokre i kyrkjelyden har blitt spurt om å vere sjåførar for arrangement som denne gruppa skal til, og det har fungert fint.

Soknepresten er medlem av kriseteamet i kommunen og møter fast der. Året 2019 vart eit år då dette teamet vart involvert i ei tragisk trafikkulykke som sterkt råka pårørende og bygdesamfunna våre her.

Soknerådet tok for to år sidan opp att å gje blomsterhelsing til pårørende før jul. Dette vert det sett pris på.

Kyrkjelydstur dette året til Alvøra kan vel gjerne reknast som eit diakonalt tiltak, i alle høve vellukka.

Internasjonal diakoni med Kirkens Nødhjelp, der konfirantar vert involverte, har ein lang tradisjon for.

Ein har hatt markering av organisasjonen «Leve», sitt arbeid, oppfølging og omsorg av etterletne etter sjølv mord . I 2019 ved eit gudsteneste i Bø kyrkje onsdag 23.oktober.

Når det gjeld diakoni saknar ein kanskje ein fast tilsett som kan ta tak i organiseringa av arbeidet. Samstundes gjer einskildmenneske i kyrkjelyden ein viktig innsats som ikkje syner att i statistikken!

Den årlege kyrkjelydsbasaren, med mange frivillige medarbeidarar, som sel lodd og går på husbesøk, kan gjerne kallast ei diakonal gjerning! Basaren var i 2019 den 20.oktober og vart svært vellukka trass i andre tiltak samme dag og tid.

Kyrkjelydsbasar, konsertar og kulturarrangement, kyrkjeblad, heimeside m.m.

v/ kyrkjeseekretær Aslak Åm Sognnes

Kyrkjelydsbasaren 20.okt.

Årets basar var triveleg, som vanleg. ☺ Omlag 80 personar fann vegen til Hyllestad kyrkje, trass i at det var opning av dagsturhytta og, denne dagen, fekk båe arrangementa god oppslutnad.

Etter ei kort liturgisk opning vart det gamle soknerådet takka av, samt det nye soknerådet presentert.

Konfirmantane har som fast oppgåve å ta seg av årsalet, noko dei klarde godt. Etter 4 årsal vart det ei økt med mat og kaffi, der drøsen kring borda gjekk livleg. Kort sagt; God Stemning! Loddbooks vart trekt og vinstar delt ut/vidareformidla. Totalt kom det inn nær kr. 55.800,- til barne og ungdomsarbeidet i kyrkjelyden, noko som må seiest vera sær brå! Takk til alle loddkjøparar, loddsejarar, vinst-leverandørar og matleverandørar for all deltaking!



Konsertar og kulturarrangement i Hyllestad kyrkje:

28. mars: **Hans Inge Fagervik, «Rock mot Rus»**, Konsert for ungdomskuletrinnet. 50 elevar til stades. Sterk formidling, direkte, usminka og fengslande.

4.april arrangerte folkeakademiet konserten **«Migrasong»**. 10 tilhøyrarar.

12.april hadde SoFt, Sogn og Fjordane teater, framsynninga **«Maria Magdalena - Jesu virke»**. Det er natta før palmesøndag, og natta før Jesus og følget hans togar inn i Jerusalem. Maria Magdalena fortel om sitt første møte med Jesus, om hans virke frå han vart døypt av døyparen Johannes og om påskeveka.

28.april heldt Asbjørn Flåm, orgel, og kona Inger-Johanne Kjøde-Enger, alt-blokkfløyte, konsert med **«Ord og Tonar i Pasjonstida»**. 8 tilhøyrarar

19. mai Songgruppa **«Moreld»** gav oss ein flott kveld, med mykje fin song. Dei jobbar med å få fleire av tekstane over på norsk, slik at fleire av oss får endå meir glede av dei sterke tekstane. Heldigvis hadde dei ei litt enklare omsetjing med essensen i tekstane som ein kunne lesa medan dei song, noko som var svært kjærkome for enkelte av oss. Takk! Vi gler oss til neste konsert! 46 tilhøyrarar

4. november Kulturskulekonsert

Det var full kyrkje, då kulturskulen inviterte til konsert første måndag i november. Takk for ein fin og allsidig konsert! Er so kjekt å sjå våre flotte born og unge få utfalda seg. Imponerende formidling.

24.november var det **Keltisk kveld** i kyrkja, med Bjørg og Kjell Sæter saman med Ragnhild Stav og Jostein Ryland. 29 tilhøyrarar

15.des. var det, tradisjonen tru, den årlege julekonserten. Eit samarbeid mellom kulturlivet i kommunen og soknerådet. I år var den lagd til Hyllestad kyrkje. Her var det 250 tilhøyrarar, altso heilt fullt hus 😊.

Kyrkjeblad – Heimeside – Facebook

Kyrkjebladet kom ut med tre nummer i 2019. Mange er takksame for å få kyrkjebladet i postkassa og betalar bladpengar. Bladpengar, saman med annonseinntekter, gjer det mogeleg å fortsetje å gje ut bladet.

I tillegg til kyrkjebladet kommuniserer Hyllestad sokn med innbyggjarane via Facebook. (søke på *Kyrkja i Hyllestad*), heimesida (www.hyllestad.kyrkja.no) og sida «Det skjer» i Firda.

Vi erkjenner at særleg når det gjeld heimesida, er vi ikkje flinke nok og hadde håpa at nokon kunne hjelpe oss med den.

Kyrkjer, kapell og gravplassar v/ kyrkjeverje

Kyrkjer

Bø kyrkje hadde ikkje vedlikehald.

Hyllestad kyrkje fekk måla tårnet som sto att etter målingsarbeidet året før. Det midtarste av vindauga på nedsida av kyrkja fekk omfattande vedlikehald der alle rutene vart tekne ut, rotne sprosser skifta før kitting og replassering av rutene.

Dessverre lukkast det ikkje å få gjort ferdig galleriet og rommet bak galleriet. Håpet er å få engasjert ein pensjonert snikkar på pensjonistløn.

Preikestolen vart, ved ombygginga av kyrkja, teken ut og sett på lager i Sørbøvåg med årleg lagerleige. Preikestolen må enten finne ny plassering eller avhendast. Dette sidan soknerådet ikkje lenger kan bruke midlar på lagerleige all den tid Hyllestad sokn ikkje kan gjere seg nytte av preikestolen.

Øn kyrkje og Øn kapell hadde ikkje vedlikehald.

Soknerådet fekk eit preikestolklede i gåve frå Gudny Eriksmoen, til bruk i kapellet. Aslaug Gjertsen, som vi hugsar godt som taxisjåfør, dirigent, organist og mykje anna, har laga botn til fileringsarbeidet. Ho var tante til Gudny. Ho sjølv, Gudny Eriksmoen, har utført dette fileringsarbeidet. Anne Dagrund Pedersen, hennar dotter, har laga utkast til motiv. Så her har vore fleire generasjonar i arbeid!

Gravplassar

Soknerådet er godt nøgd med avtalen med Åm Sognnes bygdeservice om kyrkjegardsslått og vedlikehald av gravplassane, og avtalen med Hyllestad Bygg AS for opning og lukking av grav i samband med gravferder.

Årleg arbeid på alle gravplassane er planering og tilsåing av graver. Klipping og beskjerjing av hekk og trær. Fjerning og knusing av gravminne frå sletta graver.

Bø gravplass

Arbeidet med å skifte ut gjerdet rundt gravplassen vart likevel ikkje påbyrja i år. No har vi kjøpt inn ein del materiale og håpar at arbeidet, som må gjerast på dugnad, kan starte våren 2020.

Hyllestad gravplass

Klargjering av gravfeltet mot syd er så godt som ferdig, og teke i bruk.

Øn gravplass

Gravingstilhøve på Øn gravplass – nyaste felta.

På grunn av aukande problem med store steinar i jorda, må resten av gravfeltet gravast om og steinane fjernast før vidare gravlegging på feltet. Steinane er ofte så store at ein ikkje får dei opp med minigravar og må ty til større gravemaskin. Dersom feltet ikkje vert grave om, må vi nekte tinging / reservering av grav på resten av gravplassen. Dette fordi ein ikkje kjem inn imellom med stor maskin og må plassere gravene fortløpande. Finansiering er eit kommunalt ansvar og det er løyvd midlar til dette prosjektet i 2020.

Vass-situasjonen på Øn gravplass

Øn gravplass får vatn frå ein brønn på oppsida av riksvegen – eit par hundre meter frå veggen. Etter at vi hadde vassproblem tørkesommaren 2018, var det ikkje vassmangel denne sommaren.

Oppgåver på gravplassane som i tillegg skulle vore løyste

Bø gravplass: Fjerne nokre fleire tre som har blitt for store. Skifte gjerdet rundt gravplassen.

Det er kjøpt inn ein del materiale til nytt gjerde. Vi satsar på å få gjort arbeidet på dugnad. Kome a jour med festeavklaring og få rydda det gamle gravfeltet nær kyrkja som er stengt for graving.

Hyllestad gravplass: Etter at arbeidet på felt A er ferdig, står felt B på nedsida av kyrkja for tur med å få avslutta festeavklaring. Her trengst det og påfylling av jordmasse for å jamne ut grasbakken.

Øn gravplass har behov for to nye benkar. Kome a jour med festeavklaring og få rydda dei gamle gravfelta rundt kapellet. Her lyt det fyllast på jord for å jamne ut grasbakken.

Hyllestad sokn Rekneskapen 2019

Rekneskapen til Hyllestad sokn vert ført av Hyllestad kommune, og revidert av kommune-revisoren. Dette som ein del av tenesteytingsavtalen med kommunen, og det fungerer godt.

Hyllestad sokn sin rekneskap har fire tenester:

Kyrkjeleg administrasjon, Kyrkjer, Kyrkjegardar og Andre kyrkjelege føremål. Kommunen har finansieringsansvaret for all aktivitet under dei tre første tenestene. Kommunen sitt økonomiske ansvar overfor den lokale kyrkja finn ein i kyrkelova (KL) § 15. *Kommunens økonomiske ansvar*, og gravferdslova § 3. *Kirkelig fellelsråd og kommunens ansvar*.

Aktiviteten under funksjonen/tenesta «Anna kyrkjeleg verksemd» er soknerådet sine oppgåver etter § 9 i kyrkelova (KL). Her er det berre ved *Konfirmantarbeid* at det er lovpålagt kommunal delfinansiering. Kommunen har etter kyrkelova § 15: ansvar for utgifter til *"lokaler, utstyr og materiell til konfirmasjonsopplæring"*.

Inntektene er elles offer, gåver, tilskot og basar m.m. Offer og gåver finansierer utdelingsmateriell som til dømes dåpsbilde, dåpslys, fadderhelsingar og bøker som vert delte ut, som 4-årsbok, 6-årsbok og bibel. Soknerådet mottok statstilskot til trusopplæring, der ein har rapporteringsplikt til kyrkjerådet via bispedømmerrådet. Statstilskotet dekkjer ikkje alle utgiftene soknet har til trusopplærar-stillinga, så basarinntekter og gåver fullfinansierer tiltaket årleg med om lag kr 35 000.

Tilskot, inntekt, og resultat

Rekneskapen er, under dei tre funksjonane der kommunen har finansieringsansvar + utgifter til konfirmasjonsundervisning, avslutta med eit mindreforbruk på kr. 1 260.

Noko høgre inntekter enn budsjettert og svært stram drift, samt at det ikkje var uføresette utgifter, gjorde at ein ikkje trong nytte av driftsfondet som det var budsjettert med.

Brutto driftsinntekter, inkludert inntekter under 044 Anna kyrkjeleg verksemd, er kr 3 125 366.

Driftstilskotet frå kommunen var i 2019 kr 1550 000. kr 50 000 meir enn i 2018, men same som i 2017 og 2016. Det utgjer 1,5% av kommunen sitt totale driftsbudsjett.

Brukarbetaling, avgifter og leigeinntekter kr 248 075. Refusjonar/overføringar kr 346 734. Andre tilskot, gåver og innsamla midlar kr 354 171. Statlige tilskudd på kr 466 386 er tilskot frå Kyrkjerådet til trusopplæring (interkommunal stilling; 25 % Hyllestad og 50 % Høyanger) og til avvikling av kyrkjevalet.

Kalkulatoriske utgifter og kalkulatoriske inntekter (går i null) er storleiken på kommunen si tenesteyting til soknet; kr 160 000. Det er i hovudsak utgifter kommunen har til rekneskapsføring, lønsutbetaling, revisjon, kontorlokale, snøbrøyting samt bygsleavgift for Hyllestad gravplass.

Inntekter med auka inntekspotensiale er Provisjonsinntekter. Inntekt - provisjon for formidling av oppussing av gravminne og innhogging av nye namn vart kr 12 352. Dette er inntekter som er vanskeleg å budsjettere med då vi ikkje på førehand kan vite kven som ønskjer å nytte seg av denne tenesta. Her er inntekspotensialet større, då det er mange gravminne på festa graver som burde hatt oppussing. Dette er kjærkomne inntekter, då det framleis er svært mykje oppryddingsarbeid som står att på gravplassane.

Formidling, sal av gravminne Soknerådet ønskte òg å starte med formidling av sal av gravminne for å auke inntektene, men dessverre har ingen hittil ønskt å kjøpe gravminne gjennom oss.

Brutto driftsutgifter, inkludert inntekter under tenestene 044 Anna kyrkjeleg verksemd, er kr 2 814 461. Lønn og sosiale utgifter utgjer kr 1 541 799. Pensjonsutgifter er ein stor kostnad, også for soknerådet. Kostnaden er vanskeleg å budsjettere då det er ein reguleringspremie som kan variere mykje frå eitt år til det neste. Reguleringspremien betalar ein både for tilsette som er i arbeid og tidlegare tilsette som er slutta i arbeid.

Kjøp av varer og tenester kr 835 345. Refusjonar/overføringar kr 196 589. Tilskot og gåver kr 80 728.

Kalkulatoriske utgifter og kalkulatoriske inntekter (går i null) er storleiken på kommunen si tenesteyting til soknet. Kr 160 000.

TENESTEOMRÅDE

04100 Kyrkjeleg administrasjon.

Hyllestad sokn er eit lovbestemt kyrkjeleg organ der forvaltingslova og offentlegheitslova gjeld. Kommunen har økonomisk ansvar for: KL §15 d) *driftsutgifter for fellesråd og menighetsråd, berunder utgifter til administrasjon og kontorhold.* KL § 37 *Kirkebokføring.*

Soknerådet sine lovpålagte oppgåver kan ikkje gjennomførast utan ein administrasjon av ein viss – storleik, samt utstyr og programvare. Som kommunen er medlem av KS, er soknet medlem av KA (Kirkens interesse og arbeidsgiverorganisasjon). Kyrkjebokføring og føring av gravregister treng spesialutvikla program der ein, som til KA, også betaler årlege avgifter.

Driftsutgift: kr 766 489 inkludert mva kr 13 174, kalkulatoriske utgifter kr 160 000.

Soknerådet fekk kr 17 372 til avvikling av kyrkjevalet. Val til sokneråd og bispedømmeråd.

04200 Kyrkjer

Hyllestad kyrkje, Bø kyrkje, Øn kyrkje og Øn gravkapell.

Kommunen har økonomisk ansvar for: KL §15

a) *utgifter til bygging, drift og vedlikehold av kirker.*

Det er krevjande, både for ein liten kommune og soknerådet, å ha ansvar for ein stor bygningsmasse. Like fullt står bygningane der og kommunen har økonomisk ansvar og soknerådet praktisk ansvar.

Driftsutgift: kr 771 419, inkludert mva kr 25 177, eks. avskrivning kr 124 695. Driftsinntekt: kr 107 666 inkludert mva kr 25 177, gåver kr 64 789.

Tilskot/gåver frå andre: kr 64 789. Av dei er kr 42 400 til vedlikehald av Øn kyrkje frå Bedehusstyret etter avhending av Sørbøvåg bedehus. Resten er personlege gåver. Midlane er gitt til bestemte føremål og er difor sett av på bundne driftsfond og må nyttast til det gjevarane ønskjer.

04300 Gravplassar

Hyllestad , Bø og Øn gravplass.

Kommunen har økonomisk ansvar for: KL §15

b) *utgifter til anlegg og drift av gravplasser.*

Driftsutgift 540 232 inkl. mva kr 90 239. Inntekter er festeinntekter, innbetaling for utanbygds gravferd, gravstell og gåve, eks mva: kr 119 052.

044 ANNA KYRKJELEG VERKSEMD (TIDLEGARE SOKNERÅDSAKTIVITET)

Her har vi tenester som, med unnatak av utgifter til konfirmantarbeid, vert «nulla ut» mot bundne driftsfond før rekneskapsavslutning. Dette fordi desse vert halde utanfor dei andre funksjonane der kommunen har finansieringsansvar.

Gåve og tilskot til eige arbeid under dei ulike tenestene

Det årlege statstilskotet (via kyrkjeråd og bispedømmeråd) til trusopplæring i Hyllestad og Høyanger var kr 449 014, ei lita auke frå året før, men ikkje stor nok til å kompensere løns- og prisveksten. Til dette viktige arbeidet i Hyllestad kjem som nemnt basarinntektene godt med til fullfinansiering.

Tenesta Barne- og ungdomsarbeid. Her har soknerådet dei to prosjekta: Base Camp og Ungdomsklubben. Soknerådsmedlem Jostein Ryland har ansvar for aktivitet og økonomi under denne tenesta. Jostein Ryland har teke ansvar for å skaffe midlar til aktiviteten innan begge desse prosjekta. Store inntekter under Tilskot/gåver frå andre, kr 51 650. Største innskota var Minnegåver ved gravferdene til Josteins Ryland sine foreldre og innskot frå Kirsten Ryland på kr 20 000 etter eit prosjekt ho hadde ansvar for. Dette året vart kr 26 556 sett av på det nyoppretta bunde fondet «Ungdomsklubb».

Tenesta Trusopplæring 0-18 år omfattar alt som gjeld barne og ungdomsarbeid med unnatak av dei to konkrete prosjekta «Ungdomsklubb» og «Base Camp» samt konfirmantundervisning. Dette året vart inntektsført uvanleg store inntekter:

Kyrkjelydsbasaren gav brutto: kr 55 777, gjevarteneste kr 4 000 og offer, totalt kr 65 145. Tilskot/gåver frå andre kr 76 087. Dei to største gåvene er kr 42 400 til Barne og ungdomsarbeidet frå bedehusstyret etteravhending av Sørbøvåg bedehus. Kr 31 307 frå ein bankkonto «Hyllestad kyrkjelyd, klubbarbeid» frå aktivitet i sokna for mange år tilbake. Skal nyttast til aktivitet og materiell av arbeidet Toril Lange har ansvar for. Kr 26 988 vart overført til fullfinansiering av trusopplærarstillinga. Kr 100 651 vart avsett til bundne fond øyremerkt barne og ungdomsabeid – trusopplæring.

Tenesta Diakoni: Bruk av kr 3 233 av bunde fond diakoni.

Tenesta Kyrkjelydsblad, bladpengar er kr 39 200 (ein liten nedgang). På grunn av annonseinntekter for to år vart overskotet kr 21 971, som er sett av til bundne fond.

Tenesta Kyrkjelydsarbeid. Offer til kyrkjelydsarbeid vert ført her med kr 15 935, der kr 11 712 er avsett på bunde fond.

Offer til anna arbeid/andre organisasjonar, er overført kr 33 639 (auke). Fasteaksjonen gav kr 15 234 (litt nedgang), og saman med offer er totalt kr 27 413 (nedgang) overført Kirkens Nødhjelp.

Kr 14 426 (nedgang) er overført NMS til misjonsarbeid i Mali.

Investeringsrekneskapen

Hyllestad kyrkje har hatt to prosjekt; måling av tårnet og vedlikehald av eitt vindauge. Total kostnad kr 201 470 er finansiert av tilskot frå kommunen.